



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Periódú 1 Maret 2017

Estudante Katólíka Nossa Senhora de Fátima Railaco hatudu antusiasmu maka'as aturona informasaun kona-ba kazu violénsia doméstika no abuzu seksuál ba menór

Iha 24 Feveiru 2017, JSMP hala'o treinamentu ba estudante Ensinu Sekundáriu Katolika Nossa Senhora de Fátima-Railaco, Munisipiu Ermera. Treinamentu ne'e partisipa hosi estudante nível *désimu-anu no désimu primeiru-anu* (ensinu sekundáriu klase 1 no 2) ne'ebé kompostu hosi fetonain 15 no mane nain 15.

Treinamentu ne'e ho objetivu atu hasa'e koñesimentu estudante sira nian kona-ba direitu labarik enjeral no direitu relevante sira seluk, direitu feto, conseitu jeral kona-ba Lei Kontra Violénsia Domestika, violasaun seksuál no abuzu seksuál ba menór inklui asesu ba justisa formal.

"Treinamentu ne'e importante tebes tanba fó koñesimentu ba estudante sira hodi hatene conseitu hirak ne'e inklui bele evita hosi risku ba krime hirak ne'e," dehan Luis de Oliveira Sampaio, Diretór Ezekutivu JSMP.

Reprezentante Diretór Ensinu Sekundáriu Katolika Nosa Senhora de Fatima Railaco Sr. Cesar da Silva, iha sesaun abertura hato'o nia agradesementu ba JSMP tanba konsidera katak tema/tópiku ne'ebé JSMP lori ba estudante sira ne'e importante teb-tebes. Liuliu Sr.da Silva refere ba esperensia hosi eskola refere katak estudante lubuk ida ne'ebé tenki sai eskola tanba isin rua sedu, tanba menus informasaun kona-ba idade loloos atu kaben. Tanba ne'e nia husu ba estudante sira atu bele aproveita didiak treinamentu hodi iha ikus bele utiliza informasaun hirak ne'e ba sira nia an no mós ba iha soseidade.

Durante treinamentu estudante sira antusiasmu tebes hodi rona materia ne'ebé fasilitador JSMP apresenta ba sira, liu-liu kona-ba violénsia doméstika, abuzu seksuál ba menór, no violasaun seksuál no husu perguntas barak relasiona ho materia relevante hirak ne'e. Hafoin rona esplikasaun hosi fasilitador, estudante sira foin hatene loloos katak, labarik ne'ebé konsidera menór labele deside-an atu kaben, lei ne'ebé bandu aman no inan baku oan, tipu ba violénsia

seksuál inklui maneira halo keixa bainhira mosu violénsia seksuál no violénsia doméstika hasoru sira.

Treinamentu ne'e taka ho intrega materiais ho marka Canada kompostu hosi kaderneta, lapijeira, fatin ba tau bee no sapéo.

Treinamentu ida ne'e realiza tanba apoiu finanseiru hosi Embaixada Canada, Jakarta-Indonézia.

Atu hetan informasaun kle'an liu tan favór kontaktu:

Luis de Oliveira Sampaio

Diretór Ezekutivu JSMP

luis@jsmp.tl